

**Mir sind bynenand im Name vo Gott, wo läbt
als Vater, wo öis stärkt;
als Jesus Christus, wo öis begleitet;
und als Heilige Geischt, wo öis tröschtet.
Amen.**

Herzlich Willkommen zum GD, liebi Lenzburgerinnen
und Lenzburger, liebi Gäschd vo uswärts!
Schön dass Sei cho sind dä GD zum Vatertag mitfiire.

Dr Vatertag hütt isch en Premiere iy dr Schwiz! Dä Tag
lanciert d Schwiezer Manneorganisation *männer.ch*. Ds
Ziel isch en respekt- und lustvollu Usenandersetzig mit
em Vatersy az'stosse und Wärschetzig für d Vätere
usz'drücke.

Aebeso söll ds Bewusstsy gweckt wärde, damit Vätere
Pruef und Familie besser chönd veriybare und so mit
ihre Chind en alltagsnöchi Beziehig chönd pflege.
Kei Gägeveraastaltig zum Muttertag!

Mir vo dr Chilegmeind griefe dr Ball mit däm GD uf.
Als vier Vätere vo Chind in ganz verschiedenem Alter
hei mir öis Gedanke zum Vatersy gmacht: mir das sind
dr Joe Brügger, dr Beat Leuenberger, dr Kurt Gobetti
und ig. Alli drei sy mir ou Mitglieder vo dr MG vor KG.
Mir wänd iy däm GD de Vätere aber ou Glägeheit gäh,
ihres Vatersy mit eme eifache Ritual z'sägne.

Gebet zum Vatertag

dazu aufstehen, auch zum Lied

Oeise Gott!

Alli wo mir do sind, verdanke mir öises Läbe em Vater.
Eme Vater, wo öis zärtlech gliebt und sälbschtlos für öis
gsorgt hett, wo öis würklech gseh hett und ermuetiget
hett für ds Läbe.

Derfür danke mir dir.

Villicht verdanke mir ds Läbe aber ou eme Vater, wo
abwäsend gsi isch, wo grob zu öis isch gsi,
unzueverlässig, oder öis gar missbrucht hett.

Das chlage mir dir, Gott, und drüber sy mir wüetig und
truurig.

Als Vätere sy mir dankbar und froh, für all die Momänt,
wo mir öisi Chind uf gueti Wäg händ chönne füehre, und
sie händ chönne vorbereite uf ds Läbe.

Mir danke vor dir, Gott, aber ou a die Zyte, wo mir
Vätere a Gränze gstosse sind, und öisne Chind nid das
händ chönne gäh, wo sie bruucht hätte.

Mit dr Hilf vo diner Vergäbig hilf öis derfür
Verantwortig überneh und nöii Wäge z'beschriete.

Oeise Gott, mir bekenne di hütt als öise Vater im
Himmel.

Berüehr du öis mit dinere Väterlechkeit, wo öis Freiheit
git, wo öis iy d Arme nimmt, wo öis vieles zuetrouet,
damit mir das Läbe und die Aerde schöpferisch und
liebevoll gstatte.

So dass mir voll Fröid di chönd lobe.

Amen.

Unser Vater und wir als Väter

Briefe zum Unser Vater – Gebet, Mt 6,9-13

Liebi Gemeind vo Gott!

Dir kennet alli ds „UnserVater“-Gebätt. Es isch ds Grundgebätt vo de Christe und sicher dr bekanntischt christlechi Täxt. Jesus sälber hett’s öis gschänkt.

Iy däm Gebätt redt är Gott als Vater aa. Mir wüsse, dass Jesus iy sinere Muettersproch ds Wort „Abba“ bruucht hett. Das signalisiert en vertrauensvollig Beziehig, öppe vergliechbar öisem „Papa“.

Iy öisere Väter-Vorbereitigsgruppe hei mir die siebe Bitte vom „Unser Vater“ einzeln aagluegt. Mir händ öis gfrogt, was isch es denn, was mir do vo Gott erbitte? Was schänkt är öis uf Grund vo dr Bitt „Führe uns nicht in Versuchung“, zum Biespiel? Iy dr Beschäftigung mit däm Gebätt hei mir so verschieden Eigeschafte, Qualitäten und Wärt vo öis als Väter entdeckt. Vo dene siebe Bitte här hei mir öis gfrogt, was möchte mir öisne Chind als Väter schänke und sy?

Uf däm Wäg sind siebe ganz pärsönlechi und vielfältegi Briefe a öisi Chind entstande. Die einte ganz us em Läbe griffe, die andere meh poetisch. Die Briefe möchte mir öich jetz – anstell vo dr süsch üebleche Predigt – vorgträge.

Achte Sie druf, wo Sie als Vater oder Grossvater sälber mit ihrne Erfahrig und Erinnerung iy die Briefe chönd

iystiege. Villicht fühlle sie sech ou aagsproche iy dr Rolle vom Chind vo damals. Villicht, dass do öpper vo öis Gedanke formuliert, wo Ihre Vater ou dänkt, aber ihne nie gseit hett, nie hett chönne säge.

No en Bemerkgig: es goht nid drum, dass mir Gott jetz wieder eisietig männlech wänd fixiere. Mir als Vätere händ öis eifach mit dr väterleche Siete vo Gott bschäftigt – im Wüsse drum, dass Gott öis ou müetterlechi, und ou no ganz anders, begägnen.

Dr Ablouf gseht jetz eso us, dass mir jewiels e Strofe vom Martin Luther sim *UnserVater* Lied singe. Denn chunnt öise Brief zur entsprächende UnserVater-Bitt. Aaschliessend halte mir en Momänt Stilli für Ihres Nohdänke. Denn folgt die nöchsti Strofe vom Lied und dr entsprächend Brief, und so wieter

Mir föhnd aa mit de beide erschte beide Strofe vo däm Lied 287 und denn mit em Brief zur Bitt „Dein Name werde geheiligt“.

zu „Dein Name werde geheiligt“

Mis liebe Chind!

Mi Name für di isch „Papa“. Wieviel Erwartig du iy dä Name Papa iyneleisch, gpüren ig a dine viele Froge über d Wält und ds Läbe: *Papa, warum händ d Seeräuber en Totechopf uf dr Fahne? Papa, was bedüütet Parlamänt? Papa, händ d Tier ou en Seel?*

Papa, seisch du, und vertrousch mir vor em Iyschloofe eis vo dine Gheimnis aa. Und chürzlech im See, du hesch dini erschte 10 Meter sälber gschwumme, bisch ganz sicher, dass dr Papa di hebt, wenn du nüme magsch.

Du gisch di iy mini Hand. Du chunsch mit iy mini Gedankewält. Ig stuune, mis Chind, über dä grossi Vorschuss vo Vertroue, wo du mir entgägebringsch.

Was für es grosses Gschänk – aber ou was für en Verantwortig! Iy mine Antworte uf dini Froge, iy mine Entscheidige für dis Läbe, wo du jetz no nid sälber chasch fälle, isch mir uftreit, die Verantwortig wohrz'näh.

Ds Vertroue iy dini Muetter isch dir zuecho iy dr Geborgeheit vo ihrem warme Buuch, ufgnöh hesche es a ihrer nährend Bruscht. Ig aber ig, di Papa, bi dr erschti Frömdi, Anderi iy dim Läbe.

Und so goht mir uf: als Vater wott ig dir hälfe, dass du Vertroue findsch iy das, was dir zersch no frömd isch, iy anderi Mönsche, iy d Wält, iy ds Wasser, iy ds Fүүr, iy

dr Wind und iy d Aerde. Ig wott dir hälfe, dass du das
Läbe lehrsch heilige. Und ig möcht derzue byträge, dass
du di ou als erwachsne Maa emol voll Vertroue chasch
verbeuge vor em einzig heilige, göttleche Vater. Damit
du ufrächt iy dr Wält chasch stoh!

Abschluss

Liebe Gmeind, iy dene Brief, wo mir ghört hei, hei mir Vätere Sehnsücht, Wünsch und Absichte für öisi Chind formuliert. Mir wette als Vätere wachse und öisi Verantwortig no meh wohrnäh. So wiese die Briefe über öisi gegewärtegi Situation use.

Und dermit chunnt wieder ds *UnserVater* als Gebätt iy Blick. Im Bätte bewege mir öis jo ou us öis sälber use – hi zum ene Grössere.

Ds *UnserVater* stoht iy dr Mitti vo dr Bärnpredigt vo Jesus im MtEv. Iy dr Bärnpredigt goht's um ds rächte Handle, um ds Tue vo dr Liebi und dr Grächtigkeit. Nid umesüsch bildet ds *UnserVater*, als Aaleitig vo Jesus wie mir chönd bätte, ds Zäntrum vo dr Bärnpredigt.

Alles Handle nämlech, wenn's denn grächt, us dr Liebi und fruchtbar söll sy, flusst us dr Beziehig zum göttleche Vater oder anders gseit: us dr Verbundeheit mit dr Quelle vo öisem Läbe. Ds Bätte isch ds Läbe vo dere Verbundeheit.

Ds Ritual vom Bätte erlāben ig wien en Herbärg am Wäg dur e Alltag. Iy sueche d Stilli, halte inne, gspüren mir sälber wieder besser, hole nöie Atem.

Im Bätte reflektieren ig mis Tue und mini Gränze vor Gott. Es wird klarer, was ig wott und was ig bruuche als Vater.

Im Bätte läben ig mini Beziehig zum göttleche Vater. Ich hoffe, mis Chind gespürt eso, dass si Vater nid

allmächtig isch. Dass ig ou öpperem gägenüber
verantwortlech bin; dass ig als Vater ou uf Vergäbig,
Liebi und Fürsorg aagwiese bin.

Ig gloube uf däm Wäg bliebe mir als Väter nahbari,
fassbari Mönsche, wo über öis sälber usewiese uf dä
Vater, wo öises Läbe letschtlech treit. Und ig gloube, so
hälfe mir ou öisne Chind ou als Erwachseni mönschlech
z'bliebe.

Amen.

Einladung zum Segensritual

D Zuesag vom göttleche Säge tuet öis Mönsche guet und stärkt öis für en Alltag. Aer ghört drum zentral zum Gottesdiensch.

A däm Vatertag möchte mir alli Väter speziell iylade, dr Säge vo Gott in ere eifache Handlig do im Chor vore z'empfang. Sälberständlech söll sech niemer zwunge fühle.

Wenn ig Väter säge, denn sy dermit ou d Väter mit erwachsne Chinder und d Grossväter gmeint. Mir möchte ou die Manne zu däm Säge iylade, wo no nid Vater sind, oder es ou nie wärde sy. Mir sind öis bewusst, dass ou Manne väterlechi Gfühl händ und väterlechi Qualitäre läbe, wo nid biologeschi Chind händ.

Ig möchte also alli Vätere iy däm Sinn ermuetige fürez'cho und dä Säge in Empfang z'näh. Es isch es eifachs und pärsönlechs Ritual, wo sech aber niemer muess exponiere.

Denn lad ig iy fürez'cho und en Halbkreis gäge ds Chileschiff z'bilde.

nach vorne offener Halbkreis bilden

Team vorne links: Thomas, Beat, Kurt, Joe

Stabmikro an Beat

Einleitung zum Segen

„Ich will dich segnen, und du sollst ein Segen sein“, so redt Gott zum Abraham, zum Vater vo vielne Völker, wie’s iy dr Bible heisst.

Niemer chan Säge mache, aber mir alli chönd dr Säge vo Gott erbitte, empfangen und wietergäh.

Und drum bitten ig öich jetzt guet uf em Bode z’stoh.

Denn riebet für en Momänt öichi Handflächine gägenand, dass die guet wach wärde.

Und denn strecket als Geste vom Empfange die linggi Hand eso us. – Als Geste vom Säge wietergäh mög jede Vater sini rächti Hand uf d Schultere vom Vater rächts vo sich hebe.

Nähme mir wohr, wie mir dostöhnd als Väter und Grossväter, wo Säge empfangen und Säge chönd wietergäh.

Noch es paar Ougeblick vo dr Stilli wärde mir vom Vorbereitigsteam es Sägensgebätt spräche ...

Einige Momente der Stille

Segen für Väter

T: Gott, sägne öis Väter
damit mir ds Vertroue, wo öisi Chind öis entgäge bringe,
löhnd wieterwachse zu Respäkt und Liebi zu allem
Läbe.

T: Gott, sägne öis Väter
damit mir öisi Töchter und Söhn ermuetige ihres Läbe
sälber iy d Händ z'näh und z'gstalte.

B: Gott, sägne öis Väter
damit mir mit öisem Wille d Seele vo öisne Chind stärke
und si touglech für ds Läbe wärde.

B: Gott, sägne öis Väter
damit d Arbet für ds tägliche Brot öis Ruum loht zum ds
Läbe mit öisne Chind z'gnüsse.

K: Gott, sägne öis Väter
damit mir immer wieder parat sind, mit öisne Söhn und
Töchtere en nöie Aafang z'woege.

K: Gott, sägne öis Väter
damit mir d Heiligkeit und ds Gheimnis vo öisne Chind
vor öisne eigete Aasprüch und Absichte schütze.

J: Gott, sägne öis Väter
damit mir en guete Wäg finde zwüsche Gränze setze und
Ruum loh, wenn mir öisi Chind vor de Abgründ vom
Läbe müend bewahre.

J: Gott, sägne öis Väter
indäm du als Vater öis dr Rügge stärksch.

Amen.

Einige Momente in der Energie bleiben.

Denn bitten ig öich d Händ wieder z'löse
und dr Kreis gäg vor wieder ufz'tue.

Kreis gegen vorne öffnen

Übergabe der Kerze

Als Zeiche, dass Christus jede vo öis iy sim Vatersy begleitet, zünde mir vom Team für jede en Cherze am grosse Christuslicht aa und übergäbe die Cherze öich. Derzue spielt d Orgele.

Orgel setzt ein

in der Reihenfolge Thomas, Beat, Kurt, Joe zünden wir die Kerzen an der Osterkerze an und überreichen sie, angefangen beim Mann vorne rechts, reihum.

Kerzen anzünden und übergeben mit Satz:

Du bisch gsägned – und du söllsch en Säge sy!

Dazu Orgelpiel

Zum Schluss übergeben auch die Team-Männer einander eine Kerze.

Schluss:

stehen und warten bis das Orgelspiel fertig ist oder

wenn Orgelspiel fertig und alle eine Kerze haben noch einen Moment stehen – Energie halten.

Denn bitten ig Sie jetz (als gsägneti Vätere) wieder Platz z'näh.

Abkündigung

Am vergangenen Dienstag haben wir Abschied genommen vom Herr **Albin Max Härdi-Horlacher**. Er starb in den frühen Morgenstunden des 5. Juni im 83-igsten Lebensjahr im Kantonsspital in Aarau. Er war zuletzt wohnhaft gewesen in der Wylgasse 30 in Lenzburg.

*Gott, ich bleibe dennoch stets bei dir
Denn du hältst mich bei deiner rechten Hand
Du leitest mich nach deinem Rat
Und nimmst mich am Ende mit Würde an.
(Wenn ich nur dich habe,
so frage ich nichts nach Himmel und Erde,
bist du doch Gott alzeit, meines Herzens Trost und
mein Erbteil)*

Amen

(Psalm 73, 23 ff)

Mitteilungen

Di 19. Juni 14 Uhr Seniorennachmittag mit Lotto in Hendschiken Lenzburger herzlich eingeladen.

Mi um 16.30 Uhr Bibelgesprächskreis im Alten Pfarrhaus

Nächster Sonntag GD mit SZ

Kollekte

für die Flüchtlingsarbeit des HEKS.

Z.B. Sprachkurse in Aarau für Migrantinnen. Ein notwendiger Schritt zur Integration

oder

HEKS unterstützt eine Gemeinschaftszentrum in Armenien um das soz. und wirtschaftl. Leben wieder anzukurbeln. So soll der Auswanderung der Jugend entgegengewirkt werden.

Dank

- den vier Männern!
- Helene Thürig, die sich immer wieder auf spezielle GD Abläufe einlässt.

Apero

Einladung - und Dank an Therisia Glas und Team